

SAMÞYKKT

um hundahald í Djúpavogshreppi.

1. gr.

Hundahald í Djúpavogshreppi, að undanteknu hundahaldi þarfahunda á lögbýlum og hunda sem notaðir eru til leitar- og björgunarstarfa, svo og aðstoðarhunda blindra og fatlaðra, sætir þeim takmörkunum sem getur í 3. gr. samþykktar þessarar. Samkvæmt lögum um dýravernd nr. 15/1994 fer Umhverfisstofnun með mál er varða dýravernd.

2. gr.

Sveitarstjórn fer með umsýslu vegna samþykktar þessarar og getur ráðið sérstaka dýraeftirlitsmenn eða falið starfsmönnum sveitarfélagsins hlutverk dýraeftirlitsmanns. Þeir starfa í umboði heilbrigðisnefndar Austurlands.

3. gr.

Sveitarstjórn er heimilt, vegna hunda, annarra en þeirra sem undantekning 1. gr. samþykktar þessarar tekur til, að veita lögráða einstaklingum leyfi til að halda einn hund í þéttbýli með eftirfarandi skilyrðum, gegn greiðslu leyfisgjalds:

1. Um hundahald í fjöleignarhúsum fer samkvæmt 13. tl. A-liðar 41. gr. laga nr. 26/1994 um fjöleignarhús. Við skráningu hunds skal leggja fram skriflega staðfestingu allra umráðamanna íbúða hússins á samþykki þeirra, auk eiganda viðkomandi húsnæðis, sé um leiguhúsnæði að ræða. Þegar hús skiptist í aðgreinda hluta nægir samþykki þeirra eigenda sem hafa sameiginlegan inngang, stigagang eða annað sameiginlegt húsrými. Óheimilt er að halda hunda í fjöleignarhúsum ef hundur sannanlega veldur eða viðheldur sjúkdómum hjá íbúum.
2. Hundahald er óheimilt í íbúðum á vegum Djúpavogshrepps.
3. Hundur sem færður er til skráningar skal vera merktur með húðflúri eða örmerki skv. reglugerð um aðbúnað og umhirðu gæludýra og dýrahald í atvinnuskyni nr. 1077/2004. Eigandi hundsins skal strax að lokinni örmerkingu koma upplýsingum um númer örmerkis og nafn sitt og kennitölu til sveitarstjórnar.
4. Leyfisgjald vegna hundahalds skal greiða árlega til sveitarsjóðs, skv. gjaldskrá sem sveitarstjórn setur og lætur birta í B-deild Stjórnartíðinda, að fenginni umsögn heilbrigðisnefndar Austurlands, samkvæmt ákvæðum 25. gr. laga nr. 7/1998 um hollustuhætti og mengunarvarnir, með síðari breytingum. Gjaldið skal ekki vera hærra en sem nemur rökstuddum kostnaði við veitta þjónustu og eftirlit. Einnig er heimilt að kveða á um handsömunargjald í gjaldskrá. Gjaldið skal greitt í fyrsta sinn við skráningu hundsins og síðan árlega fyrirfram, fyrir febrúarlok ár hvert. Hafi gjaldið ekki verið greitt innan tveggja mánaða frá gjalddaga, er heimilt að afturkalla leyfi til hundahalds. Ábyrgðartrygging er innifalin í skráningargjaldi, en eigandi hunds ber annan kostnað svo sem af örmerkingu, hundahreinsun o.þ.h. Við greiðslu leyfisgjalds ber leyfishafa að framvísa vottorði dýralæknis um að hundurinn hafi verið ormahreinsaður á undangengnum 12 mánuðum. Heimilt er að afturkalla leyfi til hundahalds ef hundahreinsun er ekki framkvæmd eftir settum reglum.

5. Auk örmerkis skulu hundar bera hálsól með upplýsingum um heimilisfang og símanúmer eiganda.
6. Óheimilt er að láta hund dvelja lengur en 2 mánuði á heimili án þess að sótt sé um leyfi fyrir honum. Ekki skal veita leyfi fyrir fleiri en tveimur hundum á hverju heimili.
7. Hundar skulu aldrei ganga lausir á almannafæri. Utandyra skulu hundar ávallt vera í taumi í fylgd með aðila, sem hefur fullt vald yfir þeim. Þegar hundur er í festi á húslóð, skal lengd festarinnar við það miðuð að óhindrað megi ganga að aðaldyrum hússins.
8. Hundaeigendum ber að hlíta að öðru leyti lögum og reglum, er hundahald varða, þ. á m. reglum um árlega hreinsun hunda og greiðslu leyfisgjalds, svo og fyrirmælum sem heilbrigðisnefnd setur.
9. Bændum á lögbýlum er heimilt að hafa allt að þrjú þarfahunda án greiðslu leyfisgjalds. Að öðru leyti skulu slíkir hundar háðir ákvæðum samþykktar þessarar. Hundar á lögbýlum mega ganga frjálssir á landareign eigenda sinna. Að öðru leyti skulu slíkir hundar háðir ákvæðum samþykktar þessarar. Skyllt er bændum á lögbýlum og eigendum hunda sem nefndir eru í 1. gr. hér að framan að sjá til þess að hundar þeirra séu ekki lausir á almannafæri.

Hægt er að sækja um heimild til að halda fleiri hunda, en rökstyðja þarf það sérstaklega í umsókn. Ákvæði um fjölda hunda tekur gildi við sex mánaða aldur hvolpa.

Leyfið er bundið við hund þann sem það er gefið út fyrir og á nafn og heimilisfang ábyrgðarmanns/eiganda. Leyfið er ekki framseljanlegt.

Sveitarstjórn skal halda skrá yfir hunda sem veitt er leyfi fyrir, þar sem fram koma upplýsingar um hundinn og eiganda hans eða forráðamann. Skráin skal vera aðgengileg lögreglu, heilbrigðiseftirliti og dýraeftirlitsmanni, sé hann starfandi.

4. gr.

Eigi er leyfilegt að hafa með sér hunda, þó í taumi séu, inn í opinberar stofnanir, skólahús, matvöruverslanir eða aðra þá staði sem um ræðir í 19. gr. reglugerðar um hollustuhætti nr. 941/2002. Slíkir staðir eru m.a. skv. fylgiskjali 3 með reglugerðinni:

Heilbrigðis- og meðferðarstofnanir.

Skólar.

Lækna- og tannlæknastofur.

Sjúkrahús og aðgerðarstofur.

Vistarverur handtekinna manna.

Heilsuræktarstöðvar.

Íþróttastöðvar og íþróttahús.

Gæsluvellir.

Snyrtistofur.

Nuddstofur og sjúkrahjálfun.

Sólbaðsstofur.

Húðflúrstofur.

Samkomuhús, s.s. kirkjur, leikhús, hljómleikasalir, söfn og kvikmyndahús.

Gististaðir.

Veitingastaðir.

Sumarbúðir fyrir börn.

Við framleiðslu og dreifingu matvæla skulu matvælafyrirtæki fara samkvæmt ákvæðum reglugerðar um matvælaeftirlit og hollustuhætti.

Heimilt er þó að fara með gæludýr inn í íþróttamannvirki, heilbrigðisstofnanir, snyrtistofur og önnur mannvirki þar sem fer fram starfsemi sem sérstaklega er ætluð dýrum.

5. gr.

Eigendum hunda ber að sjá svo um, eftir því sem framast er unnt, að dýrið valdi ekki hávaða, ónæði, óþrifnaði né óhollustu.

Eigendum eða forráðamönnum hunda er skylt að sjá til þess að saur eftir hundinn sé fjarlægður á tryggilegan hátt.

Ef hundur veldur nágrönnum eða öðrum ítrekuðu ónæði, óþrifum eða tjóni, þá ber eiganda eða forráðamanni að leita leiða til að koma í veg fyrir slíkt.

6. gr.

Hunda sem fangaðir eru skv. eftirfarandi skal færa í sérstaka hundageymslu, sem hefur leyfi heilbrigðiseftirlits og Umhverfisstofnunar skv. hollustuháttareglugerð nr. 941/2002.

Flækingshundar skulu teknir úr umferð. Sé ekki unnt, með örmerki eða öðru skýru auðkenni, að greina hver eigandinn er skal auglýsa eftir honum. Gefi eigandi sig ekki fram innan sjö sólarhringa frá birtingu auglýsingar og gengst ekki við broti á samþykkt þessari, sé um slíkt að ræða er lögreglu eða dýraeftirlitsmanni heimilt að láta lóga viðkomandi hundi án frekari fyrirvara.

Einnig skulu merktir hundar á flækingsi teknir úr umferð og skal tilkynna um þá til eigenda. Umráðamaður hunds ber allan kostnað af handsömun, vörslu, fóðrun og aflifun, ef til hennar kemur.

Hunda, sem ráðast á menn eða skepnur, skal fjarlægja og lóga þegar í stað í samráði við dýralækni.

7. gr.

Lögregla og dýraeftirlitsmenn í umboði heilbrigðisnefndar hafa eftirlit með hundum samkvæmt samþykkt þessari og skulu þessir aðilar tilkynna sveitarfélagi um kærur sem þeim berast vegna meintra brota á samþykktinni.

Vegna brota á samþykkt þessari vísast til VIII. kafla laga nr. 7/1998 um hollustuhætti og mengunarvarnir.

Um valdsvið og þvingunarúrræði fer samkvæmt VI. kafla laga nr. 7/1998 um hollustuhætti og mengunarvarnir.

Leyfishafa er skylt að greiða kostnað sem leiðir af brotum á samþykkt þessari.

Endurtekin eða alvarleg brot geta leitt til leyfissviptingar.

8. gr.

Sveitarstjórn er heimilt hvenær sem er að afturkalla leyfi fyrir einstökum hundum eða öll veitt leyfi, telji hún það nauðsynlegt í þágu hollustuhátta og öryggismarkmiða. Um slíkar ákvarðanir skal gætt ákvæða stjórnisýslulaga.

9. gr.

Samþykkt þessi staðfestist hér með skv. ákvæðum 25. gr. laga nr. 7/1998 um hollustuhætti og mengunarvarnir með síðari breytingum og öðlast gildi þegar við birtingu.

Ákvæði til bráðabirgða.

Þeir sem halda hunda við gildistöku samþykktar þessarar, en hafa ekki fengið til þess undanþágu frá takmörkunum við hundahaldi, skulu afla sér leyfis í samræmi við samþykkt þessa innan þriggja mánaða.

Umhverfisstjórnuneytinu, 1. október 2008.

F. h. r.

Sigríður Auður Arnardóttir.

Sigurbjörg Sæmundsdóttir.

B-deild – Útgáfud.: 30. október 2008